

T2259.7/1631



Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17
Lab D50.2	95/0/2	81/0/0	66/0/0	51/0/1	35/0/0	20/0/0	29/19/54	55/39/33	42/57/29	82/4/79	51/50/13	50/28/29						
		38/14/16	66/16/18	50/5/22	43/14/21	55/9/25	71/32/0	62/34/60	40/9/43	52/48/17	31/21/21	72/23/57	73/19/68					

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

國朝列卿紀卷之十六

詹事府詹事行實

傅瀚字曰川江西臨江府新喻縣人天順甲申進士改庶吉士授檢討進修撰成化間孝宗出蜀命兼司經局校書遷左諭德兼檢討充經筵講官及東宮講讀官時方士李孜省爲通政使得侍經筵瀚進講極言汰冗官李銜之不爲動孝宗嗣位以舊學恩進太常少卿兼侍讀仍充經筵講官兼日講每進講誠意懇切敷陳詳婉而進止雍容上每注聽焉三年

憲廟實錄成進官太常卿兼侍講學士弘治六年遷禮部右侍郎九年南京吏部缺尚書僉舉尚書倪岳瀚言倪之才何可寘之

哈佛大學漢和
圖書館珍藏印

南或謂倪往公不當次進乎瀚曰吾知爲國遑恤其他及金谿徐公瓊進尚書瀚轉左侍郎徐凡事多倚成之司屬按呈必自問曰傅先生以爲何如初祠部給度十年一舉時僧道入京師以萬計權貴多爲之請瀚力言此輩蠹耗天下宜痛加禁革縱未能如 祖宗朝之制亦當稍賜裁抑遂改十年給度之例時以龜山楊時從祀孔子廟廷言者因謂羅從愿李侗亦當從祀瀚言二子著述視尹焞游酢謝良佐未知所先後二子從祀則三人似不可遺道學所在其可濫乎乃止已未知貢舉俄用廷薦以本官兼翰林學士掌詹事府事仍兼日講官會典副總裁庚申進禮部尚書詳禮部

吳寬字元博直隸蘇州府長洲縣人生有異質未冠時入郡庠輩流方務舉業寬獨博覽羣籍爲古文詞下筆已有老成風格屢試應天不利以歲貢資入太學東海張汝弼見之曰天下亦有此貢士也哉江陰卞郎中華伯有低頭拜東野之句武功伯徐有貞高邁少可折節與交曰館閣器也寬以屢舉不利絕意仕進不肯復應舉天台陳公選時以御史董學南畿以禮敦遣之不得已入試名在第三成化壬辰會試第一入試大廷又第一授翰林院修撰旋被選侍 孝宗於東宮十七年秩滿進右諭德 孝宗卽位以舊學進春坊左庶子弘治三年預修 憲宗實錄成進詹事府少詹事兼侍講學士六年擢吏部右侍郎

七年丁憂九年補原職十一年轉左十三年命兼翰林學士掌
詹事府事入內閣掌制誥仍侍武宗於東宮充會典副總
裁十六年會典成進禮部尚書兼學士仍典制詔及修歷代通
鑑纂要仍充副總裁寬素有古學及入翰林凡有作輒傳播中
外位益高望益重學者稱爲匏菴先生而不敢字每東朝進
講閑雅詳明意存諷諫至理亂邪正之際未嘗不反覆爲上
誦之武宗在東宮學少閒率僚屬上疏曰竊惟東宮講學
自寒暑風雨朔望令節外一歲之中不過數月一日之中不過
數刻况其間又多間歇人生八歲出就外傳住宿於外誠欲離
近習親正人也庶民且然况有天下者乎借曰習讀於內終不

若出就外傳親近儒臣講明治道所得爲多也建議者謂元儒
吳澄出處不正不宜從祀孔子詔廷議之寬言從祀亦觀其

有益於經傳否耳苟有裨經傳則楊雄馬融昔皆不廢今獨得

廢澄耶太皇太后將祔廟詔議其禮寬曰昔周祀后稷姜

嫫祭於別廟詩謂之閟宮魯桓公之母仲子不得祔廟春秋書

考仲子之宮至宋始有兩后並祔之說然豈後世所宜法哉

詔從之及年甫七十數引疾求退屢詔懇留有學行聞望輿論

攸歸之褒十七年甲子七月卒於官訃聞孝宗震悼命有司

治葬諭祭者四給驛舟遣官護送特贈太子太保謚文定寬

好古力學至老不倦於權勢榮利處則退避如畏然在翰林時

於所居之東治園亭雜蒔花木退朝執一卷日哦其中每良辰佳節爲具召客分題聯句爲樂若不知有官者被選宮僚人動色相賀歎感然曰我何以當此任哉何以堪此勞哉及日講

內殿尤世所榮而辭之至再至三當道見其誠不強也及掌誥制久衆望其柄用當道忌之逕徊不進意寬亦不能無少望寬曰吾初望不及此吾處此甚宜之甚安之衆議爲之冰釋及吏部尚書位缺中外皆屬寬又固辭之爲人端清淵穆不溷溷爲同不嘒嘒爲異士無賢愚見者靡不歸心寬亦保合兼容不見畛域平生不聞有毀譽之言亦不見愠怒之色其古所謂大雅君子者乎其爲文不事追琢歎嚴體裁蘊藉簡淡理致悠長爲詩

用事渾然天成不見痕跡沉著高壯一洗近世尖新之習作書姿潤中時出奇崛雖規模於蘇而多所自得云

野記云公未達時家應織人役徵擾百端公見重於有司其父亦長者不以有公怠事或當苛甚時謂公曰盍一白之上官公曰譬我不做秀才乃潛入金胥徒以寬其事父不知也里僮子以憾公伺夫人出隨詈公於車旁公召還戒勿應而已縣官矯激束縛公家人至事公禮儀亦矯而簡慢公殊不介意縣官述職公正佐吏部冢宰欲黜此令問公公曰謂之最固非公黜之亦未至是冢宰從遷佐別部

尚書李傑云公吳中有田數百畝每歲租入視親戚故舊之貧

者分給之友人賀解元恩在京邁疾遷至其邸再夕視之賀死
殯之爲衣素一月鄉人教官某客死於京貧甚其子假貸於人
公聞之惻然亟命還所貸自出白金爲衆先衆皆樂助竟得以
喪歸

都御史徐源云公掌府事時篁墩程學士敏政以策免起復故
事起復官前所歷俸不入考公曰少詹學士職與我同彼則先
官卽日上疏請以印讓上有 旨命公仍掌之士益多公

大學士王公鏊序文集曰公頗好蘇學其於長公每若數數然
者及其爲文力去浮豔一歸醇雅紆徐則有歐之態老成則有
韓之格信其學力之至自得者深乎其所養可知已明興文人

代作獨楊文貞公爲之最爲其有典則也公之文視文貞吾未
知所先後位亦顯矣使獲當路於時其功業豈少哉議者至今
惜焉而公之所以自托於不朽者固自有在又何待於外者歟
張元禎字廷祥江西南昌府南昌縣人生而靈異五歲出語驚
人 寧靖王聞其名召見之命爲韻語響應無窮有心定萬事
定之語王倨然驚曰異哉斯童他日必爲 國家偉器父松亭
翁攜以入閩閩人所在聚觀丐其詩文少長還爲弟子員都御
史韓公雍甚奇之初 寧靖王書元徵二字貽之因以名至是
韓公爲易之曰元禎字廷祥謂當爲國家祥瑞也天順己卯占
江西鄉試明年擢進士時詔北人爲庶吉士而南方止三人江

西惟元禎文名歛起久之授編修會 憲宗初卽位上疏勸行
三年喪又上疏言治道大本大原曰講學曰聽治曰用人曰厚
風化行此四者則庶政畢舉三年丁亥與時宰議不合迺乞歸
家居二十餘年益潛心性理之學名益高廷臣疏薦者甚衆有
謂氣節恬退當今鮮倫至或有學貫天人之許當是時天下士
大夫日望其起而元禎確然如不復有意於斯世也 孝宗卽
位召同修 憲宗實錄至則擢左春坊左贊善又上疏勸行王
道反復幾萬言己酉主考應天鄉試四年實錄成陞南京翰林
侍講學士本年又乞歸養母家居又九年十二年修 大明會
典 召爲副總裁至則陞翰林學士侍 經筵日講時 孝宗

雅意向用特爲低几就聽之旋以母憂去十五年服闋擢南京
太常寺卿十六年修歷代通鑑纂要又 召爲副總裁至則改
太常寺卿兼翰林院學士掌院事仍侍 經筵日講并侍 東
宮講讀十七年命掌詹事府事管內閣 誥勅上疏勸經筵宜
講太極圖西銘 東宮兼講孝經小學 孝宗欣然嘉納亟索
太極圖以觀曰天生斯人以開朕也且將大用之不果 武廟
卽位進吏部左侍郎仍充 實錄副總裁未及上於正德元年
十二月以疾卒元禎癯然纖弱而崖岸孤削剛毅之氣不可犯
人有過面折之爲文必欲作不經人道語晚迺削異爲同黜奇
爲平所交若陳布政選羅修撰倫陳檢討獻章皆以道學自許

者云入翰林未幾卽歸臥林下名高一時天下士想望其風采
晚年始起立華要駸駸大用同列忌而毀焉昧者弗察其然和
之亦不究其中之何如也一公之身何前譽之多後尼之深耶
然名在天下則不可得而毀云

大學士李東陽云公少侍父疾顙天請代喪禮尚古事母色養
惟起召時不及躬歛憾之終身其於書史務博涉尤好探經傳
蹟義多所獨得一時談理學者數人各樹門戶而公岸然中立
作易詩春秋要語四書集要太極圖說要綱目近思錄家語解
要皆未脫藁爲詩文始務奇崛勇脫蹊徑晚就平實若出二手
然類爲人所重莫爲軒輊

尚書林俊云先生居常經濟氣節自命綱常治道多所論列

英廟實錄成故事當進秩先生論元臣不當謬加孔子號文宣廢
立復起之奸不並立徑去家居垂三十年善流委心有忠義恬
退鮮倫學際天人之薦深源蒼生固有餘望焉起修 英廟錄
受知 孝宗累被殊遇特講筵前席治道稱 上意勸講太極

圖 上索觀慰懌有天生斯人開朕之感極意大用不幸 宮
車晏駕 武皇卽位以侍從恩進吏部左侍郎兼翰林院學士
食從二品俸知 內制充實錄副總裁而事卒齟齬連疏乞休
上溫旨懇留先生意不自釋倏一疾竟弗起嗚呼是無入宮見妬
嘒嘒其易缺者邪何其收之家而損之朝也先生仕籍四十有

七年在朝不滿九年擬之持祿無過耶先生其無猶人者乎容
容厚饗終其身未嘗一日去官者何限何詳此而略彼也無害
爲同又何害先生爲獨邪嗚呼古之道其信乎不可行於今矣
癸亥太常之起予視江右僭及行止爲先生謀先生曰學有體
用某將行所學以自副避言避色其容竟一日留也嗚呼斯先
生志也

楊廷和字介夫四川成都府新都縣人成化戊戌進士改庶吉
士授翰林院檢討歷修撰侍讀進左春坊左中允弘治十六年
陞左春坊大學士兼翰林院侍講學士尋陞詹事府少詹事兼
翰林院學士正德元年進本府詹事仍兼學士詳內閣

劉機字文衡順天府大興縣人成化戊戌進士改庶吉士授翰
林院檢討累官翰林院學士弘治十六年陞詹事府少詹事仍
兼學士充日講十七年八月御 經筵機講孟子責難一節三

十日 孝宗召大學士劉健李東陽謝遷諭曰昨者命李榮來
說日講時機講陳善閉邪字解做陳說不是止云敷陳其說乃
可皆應曰諾劉健曰昨李榮又說以善道啓沃他他字不是

上笑曰他字也不妨大抵講書須要明白透徹直言無違道理皆
是於上原有的不是纂出若不說盡也無進益且先生輩與翰
林院是輔導之職皆所當言劉健對曰臣等若不敢言則其餘
百官無敢言矣 上曰然謝遷曰 聖明如此講官愈好盡心

東陽曰今年 聖學緝熙中外臣民無不仰戴臣等敢不仰承
聖意皆叩頭謝 上又曰先生輩可傳與他不必顧忌又曰他字
亦不妨昨因話偶及此意以不若啟沃上更好然不必深計也
皆復謝而出時代府世子以酌酒革爵及卒 朝廷葬以世子
禮其子嗣王以追封請且欲祔廟下禮部集議不可機曰葬以
世子其罪已原進封固宜也不可廟享乎 上是其言正德元
年陞禮部右侍郎二年轉左尋兼翰林院學士掌詹事府事管
內閣 誥勅會禮部尚書李傑忤逆瑾致仕進機尚書理禮部
事加太子少保詳南京兵部

梁儲字叔厚廣東廣州府順德縣人成化戊戌進士改庶吉士
授翰林編修歷侍講司經局洗馬尋進翰林院學士弘治十六
年陞詹事府少詹事仍兼學士本年陞吏部右侍郎正德元年
轉左二年命兼學士修 孝宗實錄及修大明會典俱爲副總
裁尋進吏部尚書仍兼學士掌詹事府事管內閣 誥勅三年
止掌府事尋命同少傅王鏊爲會試考試官四年爲修會典降
吏部右侍郎累官內閣少師詳內閣

劉忠字司直河南開封府陳留縣人成化戊戌進士改庶吉士
授翰林院編修歷侍講侍讀學士性峻少通行方寡合一介不
苟取惡人奔競自處過抗貴人亦力抑之故三紀始拜從五品
弘治十八年進翰林院學士充日講官正德初近習導 武廟

動搖成憲忠嘆曰吾講讀舊臣也疏戒逸遊崇聖德力攻近習
及二年春 上御經筵忠爲講官附經義規 上缺失及諷時
政不得在內傳 旨陞南京禮部侍郎已中貴人知其高節進
尚書本年改南京吏部尚書忠毅然持風裁越閩胥人革役者
貨縣胥竄名吏籍中上部往往冒官去忠命四主事稽厥籍年
經月緯究竟接代凡革罷千人雖仕者亦追論除名庶僚滿秩
爲署考必當實御史某恃勢驕人皆憚屈忠署下考郎中某瑾
黨張綵私昵者也乃署考曰守已垂於士論行事拂乎人情自
是諸司弗飭者惴惴焉縮其蹤少師焦芳亟薦其賢瑾傳 旨
徵改吏部尚書兼翰林學士掌詹事府事一見不相合瑾誅始
被推入內閣詳內閣

白鉞字秉德直隸真定府南宮縣人成化庚子舉京闈第一甲
辰舉禮部廷試第二人及第授翰林院編修弘治戊申同修
憲廟實錄以內艱去癸丑同考禮部丙辰秩滿遷侍讀已未充
經筵講官壬戌復同考禮部 武宗在春宮癸亥修 大明會典
成進侍講學士 賜宴禮部尋 命與修歷代通鑑纂要甲子
考南畿鄉試乙丑以 登極恩進學士加從四品俸充日講官
賜紗帽鞞鞮諸物正德丙寅開 經筵賜白金綵幣 車駕視大
學賜坐彝倫堂丁卯 命教庶吉士署掌院事擢禮部右侍郎
賜御製蟠龍諸物并纂要本年改吏部三年轉左尋陞禮部尚書

已巳 賜玉帶庚午復 命兼學士入內閣專典誥勅掌詹事
府事以寧夏平 賜賚加金牌加太子少保居月餘以疾卒年
五十贈太子太保謚文裕 遣官諭祭勅有司治葬事鉞以公
卿子習聞 朝廷典故加之問學博涉強記詞翰清美見稱於
時而久職文字專禮樂無甲兵錢穀之寄故以此終其身其爲
人重厚政尚寬簡不爲骫骳之行瑣屑之節值所難處多爲遜
避而未嘗遂失乎正其所著有怡情稿若干卷

靳貴字道充直隸鎮江府丹徒縣人弘治庚戌進士第二名授
翰林院編修歷兼司經局校書春坊右中允左諭德兼侍讀累
官吏部右侍郎正德五年命兼學士管誥勅掌詹事府事六年

辛未命同少傅劉忠主考會試時言者發其私以家僮可勤受
賄鬻題於常州舉人某某受千金禮部移文內簾劉忠驗號一
人中式比填榜黜之曰用戒贖貨已出院給事中馬卿上疏劾
之竟坐奴罪貴亦不辨會劉忠致仕大學士楊廷和以貴門生
欲引代之 朝廷以禮部尚書費宏代貴憾之廷和進貴禮部
尚書仍兼學士照舊管事後九年進讒罷宏命兼文淵閣大學
士代宏詳內閣

蔣冕字敬之廣西桂林府全州人成化丁未舉進士選庶吉士
授編修弘治庚申兼司經局校書遷右中允乙丑預修通鑑纂
要轉右諭德兼侍講正德丙寅預修 孝廟實錄充 經筵講

官丁卯歷侍講學士庚午主考應天鄉試辛未陞少詹事兼侍
讀學士是歲擢吏部侍郎甲戌兼學士典 誥勅掌詹事府事
是歲陟禮部尚書仍兼學士十一年丙子命兼文淵閣大學士
入閣詳內閣

毛紀字維之山東萊州府掖縣人成化丙午山東解元丁未成
進士改庶吉士讀中秘書弘治二年授翰林院檢討同考丙辰
會試己未歷修撰充 經筵講官選侍 東宮講讀賜五品服
癸亥修 大明會典書成陞侍讀 賜給驛歸省再同考乙丑
會試 武廟卽位進左春坊左諭德兼侍講 賜金帶正德元
年丁父艱四年服闋值逆瑾竊政削其春坊銜本年 孝廟實

錄成陞侍讀學士充日講官尋陞翰林院學士五年擢戶部右
侍郎本年陞禮部右侍郎六年丁母艱十年服闋改吏部左侍
郎本年陞禮部尚書兼翰林院學士掌詹事府事 賜玉帶時
遣使西域齋番供紀奏言西番佛國遠在數萬里外 祖宗朝
雖許入貢賜法王國師名號特藉以羈縻番衆令不爲邊患而
已齋供媚之失 天朝體又以 儲嗣未建疏乞早定大計十
一年以學士司誥勅仍掌府事 賜麒麟服蟒龍衣絛環繫帶
等物十二年勅兼東閣大學士入閣

李遜學字希賢別號悔軒河南汝寧府上蔡人也爲兒時奇異
甫長嗜學器業過人讀書能數行俱下一覽輒不忘素爲提學

陳選吳伯通珍重領成化丁酉鄉薦丁未舉進士改翰林院庶吉士弘治己酉授檢討充 經筵講官丙辰春爲會試同考官

所取濮韶輩皆海內名士夏用大臣薦授浙江僉事奉 勅提

督學政教士以德行爲先文藝次之品藻允協輿論戊午丁父

憂時司寇張子麟守汝延於謝顯道書院拔所屬士之尤者師

事之後舉進士鄉貢者三十餘人辛酉服闋改陝西提學僉事

覈士如在浙當道奏旌之尋陞本司副使丁繼母憂正德丁卯

復改山東提學學政亦如初戊辰陞太常寺少卿提督四夷

已而兼翰林院侍講是歲秋 上御經筵講尚書多所諷諫裨

益弘多李西崖以一鳴驚人稱之庚午陞戶部右侍郎提督太

倉尋改禮部壬申陞本部左侍郎以三載考績給 誥勅贈祖

父母父母封妻皆如其官及以 恩典當蔭子一人乃以弟遜

志子汝翼補蔭甲戌知貢舉乙亥陞南京禮部尚書丙子改北

京禮部丁丑春兼翰林院學士掌詹事府入內閣專管 誥勅

仍奉命教庶吉士敷歷中外三十餘年忠慎清勤保終如始不

與世浮沉博覽彊記諸子百家書皆能淹貫善屬文以理爲文

而氣以輔之緯章繪句人皆樂於諷誦詩亦清新俊逸有唐人

風采興卽對客麾毫稿凡若干卷己卯春以疾卒於官時年六

十有四天下至今惜之

劉春字仁仲號東川一號樗菴四川重慶府巴縣人成化癸卯

舉四川鄉試第一丁未舉進士 廷對爲天下第一授翰林編
修 憲宗賓天 孝宗御極戊申正月充修 憲宗實錄官分
職戶館二月 上幸國子監翰林自檢討以上侍從儒臣皆祭
服隨班後陪祭春以編修與焉辛亥八月實錄成陞修撰仍
賜宴於中府九月給賞白金三十兩織金羅段紗各一素羅段紗
各一絹六十月推內書館教書壬子選充 經筵展書官五月
端陽節賜紙虎牙骨扇虎頭縹壽絲等物癸丑充 殿試掌卷
官四月賜端陽節物如前自是歲以爲常七月疏乞歸省給道
里費乙卯四月復任己未充會試同考試官庚申九月選充
東宮講讀官有翰林春坊兩班會春坊班員缺欲改宮寮以將九

載遂以修撰班春坊直日講讀辛酉八月選充經筵講官壬戌
二月三考滿陞左春坊左諭德十一月以東宮講讀 恩賜大
紅織金雲鴈羅段紗一藍絹一玳瑁帶一連合癸亥三月以纂
修大明會典成陞翰林院侍讀學士五月 詔選修通鑑纂要
九月以 東宮長髮 賜大紅栢枝絲羅二表裏花銀二十兩
十二月 命視牲南郊自是歲以爲常甲子以御史府君鄧夫
人明年偕七十再乞歸省 命給驛行且 賜道里費乙丑冬
還朝 孝宗賓天 武宗御極以隨龍恩陞學士 詔纂修
孝皇實錄得兵館丙寅以 上初祀南郊 賜大紅白鷗段一疋
舊例賜止三品而上學士預 特恩也分獻北鎮玆自是每歲

皆預分獻二月 上耕籍田幸大學皆扈從 賜坐於彝倫堂

開 經筵賞銀三十兩大紅綠段各一絹二鈔一千貫九月

上念青宮舊勞 特賜金鑲玳瑁帶一又賜 御製盤龍迴文十

二軸丁卯四月 命掌院事八月充順天府鄉考試官十一月

以通鑑纂要成 賜綵段一絹一銀五兩戊辰三月充 殿試

讀卷時從子鶴年與試辭不與仍 賜鈔一千貫三月 命教

庶吉士邵銳等於院署四月開武舉充試官武舉有錄自此始

其條格皆創為之最稱折衷五月五日 特命隨內閣大臣觀

標騎於虎城十一月聞御史府君訃以憂歸辛未二月服滿陞

吏部右侍郎十一月 賜大明會典通鑑纂要各一部十二月

轉左侍郎壬申三月以閣薦 命不妨部事充 經筵日講官

五月 賜虎鬚絲壽縷牙骨扇有青織金羅袋以三品以上官

也十一月以河北平盜賚外庭建議功 賜大紅織金孔雀段

一花銀十兩癸酉六月陞禮部尚書尋 賜對類一部九月

賜玉帶一甲戌二月會試知貢舉官五月 賜虎鬚絲等物有加

扇袋用大紅織金羅以二品以上官也九月 賜大紅織金麒

麟段紗各一絹一乙亥聞鄧夫人訃時尚書未滿考 特許誥

贈二代鄧夫人自宜人至夫人以 經筵日講 東宮講讀勞

賜祭葬遣禮部主事余才經紀其事於家仍給驛以行戊寅以服

除卽其家改南京吏部尚書疏辭不允巳卯四月上任庚辰八

月入賀 萬壽聖節且滿初考奏未下辛巳正月以閣薦禮部尚書兼翰林院學士內閣專管 誥勅二月復職 命下仍蔭第三子延年國子監讀書五月 命掌詹事府事 廷試爲讀卷官會選廖道南等進士二十四員改庶吉士 命教習文業於翰林院未廷謝以六月初三日不起春在翰林二十餘年乞歸省者再爲學士事同官十人具慶者惟春士大夫蓋侈談之每以職在論思手不釋卷坐必夜分起必五鼓如未第時凡儒臣榮遇如 經筵講官 東宮講讀及日講皆徧歷之及在銓曹少傅遂菴楊公爲太宰特重春古朴人材登進多所裨助在禮部兩遇 郊祀大禮一遇會試貢院舊格爲之新凡舉動皆

爲遠久計不務目前西僧有欲奪民地於甘州且乞遣官督建寺時關中實饑春力爭以爲不可大略謂非止病民邊警至不可支持必致擾疏入幾兩月報下竟停之占城失國在他所世嫡求冊授春 廷議以爲 朝命不可辱在草莽引春秋公孫青爲據得不遣宗藩請封及婚嫁弊孔百出春卽檢其行駁者盡語之吏不得欺以求賄又以祭葬謚議關係勸懲乃奏爲定格要家及故舊有以厚利力請者不爲動久之亦安其所宜得心亦莫之怨也每勳戚大臣病故 上遣諭祭葬家輒厚幣爲謝習以爲常春曰以尚書而受其贈遺豈惟輕已如 國體何故事功臣襲爵表謝又皆禮部堂上分撰謝以銀幣悉却之其

謹峻有守如此。行人傳檄有事德府聞母病京師疏入以爲事且緩乞得回京省視選曹以差遣隸禮部移咨至春曰苟可勸孝而無病於公何成案之檢耶卒爲題覆江西提學僉事田汝耕乞印如分巡官以便關防前此屢有請者例不應給輒報罷春以憲臣領風教關係士習顧後於他務耶奏議添設官用關防例遂徧諸省其不拘曲而勵名教又如此春忠清嚴重毫髮不苟門無雜賓待物寬簡敦朴以致三部寮屬及文武科門生皆敬如私親久而愈切其在南部職殊簡則曰南北祿同可自便乎黎明卽起視事且挾一帙以行坐必移時乃還卽吏竊識視之數日後帙必更易也惟春大受特立雖未見其矯矯之節而光明俊偉不可奪志已未會試有舉子私謁者直遣之曰亦不汝名也其人震讟而去爲學士推祭酒者一在禮部推吏部一推內閣者再其在南部亦嘗一薦吏部皆不果用春守正不撓外和而內剛凡陞進有機輒自失之不色悔其禮部推入內閣太宰楊公爲舉首次卽春楊公不自翰林者時禮部方奏止西僧請乞辭甚激切因私服曰雖入必在我而乃略不自爲地非仁且勇者弗能也遇上修省疏與止貢獻皆反覆論辨期於感格請托有負盛焰者人應接恐後春必執以理後亦無他通鑑纂要成例增秩逆瑾初得志方延諸史官一至其家春合衆議不往遂被廷詰以書成字畫濃淡不勻奪月俸官遂以不

國朝文苑

進久乃有銀幣之賜及以憂歸又遭邏卒于道伺之卒無所得而還待物和而有則人不見喜怒至正義所在則毅然爭之不能奪也每語後進拳拳不欲失秀才風味見不可意事輒頻顛曰士大夫存心行事何必乃爾不逐時好爲徑趨計在官三十年猶一日平生疾不多至于時事可憂則中夜危坐若身履其患者在吏部辭禮部之擢在南部及辭 誥勅之命凡七疏得 溫旨有卿學行老成譽望素著及簡在朕心具悉誠悃之褒尚書 賜玉帶甫三月春力辭或曰無例且隨衆得之春嘆曰審爾則吾心事將不能自遂矣非求異也在翰林以文字爲職 經筵勸講累進規諷會有斥異端之語連上 孝皇亦爲

之色動吏部又居佐無以自見惟禮部章奏始自己出每奏上館閣大老始知春志在建立非苟然者及門之士多所造就如左春坊左諭德兼翰林院侍讀溫仁和監察御史母恩員外郎湯佐主事牟泰進士王紀羅尚愛其著者其他尚多爲詩文力追古作晚益簡勁類其爲人字畫規模於歐而自成一家宛如冠冕佩玉有心畫焉南京禮部尚書吳儼同舉進士爲禮部侍郎時朝莫出入間及見有應酬之作相謂曰與交三十年老友矣在翰林不爲不久今日乃有以知公吁吾淺之爲心也同鄉馬侍郎廷用亦每曰吾館閣中縝密者爲某某疏爽者爲某某敏達者又甚至粹然如出於一日者吾惟東川先生見焉碑板

在四方者甚衆有鳳山稿數卷藏于家贈太子太保謚文簡大學士楊廷和銘其墓曰重慶先達曰蹇忠定文簡繼之煒煒輝映其始從事史局講筵隨試自效職業罔愆四典三禮秩亦屢遷法守是慎不比於權召自留都司 帝之制行將大受參預政事諧于庶尹以贊新治胡進之難胡奪之易

石瑄字邦彥直隸藁城縣人成化丁未進士選庶吉士弘治己酉授翰林院檢討與修大明會典同考會試少師李文正每曰諸後進可托以柄斯文者其石氏季方乎辛酉充 經筵展書官乙丑遷修撰同修 孝宗實錄正德丙寅 武宗初開 經筵充講官 賜宴及銀幣尋遷南京翰林院侍讀學士正德己

巳擢南京國子監祭酒庚午改北監尋陞南京吏部右侍郎乙亥改禮部丙子轉左丁丑 命兼翰林學士掌院事授庶吉士業庚辰主考會試又主考武舉事辛巳擢禮部尚書兼學士掌詹事府事嘉靖初吏部缺尚書廷議首以瑄名 上報可是時輔臣有不悅之者託辭以請 命兼學士在內閣專管 誥勅詳內閣

賈詠字鳴和河南臨潁人弘治己酉舉河南鄉試第一丙辰登進士選庶吉士授編修充 經筵講官正德四年忤逆瑾以纂修事改兵部武選主事五年遷禮部祠祭員外郎瑾誅還編修六年遷左春坊左中允兼修撰正德九年轉侍講學士掌南京

翰林院十一年拜南京國子祭酒故事臺省有缺選博士等官充之而南監不得與詠疏以南北一體宜采擇以勵有志詔可之十三年轉北祭酒以父樂菴翁年九十有五便道歸省旋丁憂十六年擢為禮部左侍郎嘉靖二年改吏部左侍郎三年兼學士掌詹事府事專管 誥勅纂修 武廟實錄充副總裁官四年晉禮部尚書詳內閣

吳一鵬字南夫直隸蘇州府長洲縣人弘治癸丑進士選庶吉士 年授編修十 年陞侍講調南京刑部 司員外轉南京禮部 司郎中正德 年復侍講七年陞侍讀學士八年陞南京國子監祭酒十年陞南京太常寺卿十二年丁憂十六

年服闋補原任嘉靖元年陞禮部右侍郎二年轉左三年陞兼翰林院學士掌府事四年加禮部尚書兼學士仍任六年改禮部尚書加太子少保本年調南京吏部仍太子少保八年致仕謚文端

吳一鵬字 直隸長洲人弘治癸丑進士嘉靖二年以禮部左侍郎兼翰林學士掌府事四年加禮部尚書六年改禮部董玘字 浙江會稽人弘治乙丑一甲二名嘉靖四年任兼學士六年陞吏部右侍郎

張孚敬字秉用浙江永嘉人正德辛巳進士嘉靖四年任兼學士五年入閣歷少師詳內閣

桂萼字子實江西安仁人正德辛未進士嘉靖四年任兼學士六年遷禮部右侍郎入閣歷少傅詳內閣

徐縉字直隸吳縣人弘治乙丑進士嘉靖六年任兼學士本年陞禮部右侍郎歷吏部右侍郎

溫仁和字四川華陽人弘治壬戌進士嘉靖六年以吏部侍郎兼學士掌府事本年丁憂

霍韜字廣東南海人正德甲戌會元嘉靖六年任兼學士九年丁憂

黃綰字浙江黃巖人官生嘉靖七年任兼學士本年陞南禮部侍郎歷禮部尚書

顧鼎臣字九和直隸崑山人弘治乙丑狀元嘉靖七年任兼學士加至禮部尚書太子少保十七年入閣歷少保

溫仁和詳前嘉靖十七年以工部尚書改禮書兼學士掌府事加太子少保二十年致仕卒謚文恪

霍韜詳前嘉靖十八年以禮部尚書兼學士協掌府事加太子少保二十年卒謚文敏

陸深字直隸上海人弘治乙丑進士嘉靖十八年任兼學士二十年致仕卒贈禮部右侍郎謚文裕

張邦奇字浙江鄞縣人弘治乙丑進士嘉靖二十一年以吏部左侍郎兼學士掌府事本年回理禮部事改南兵部尚書

張潮字惟信四川成都府內江縣人父勁菴為行唐主簿時年
 十二携從任令游學於內翰劉五清先生之門恒讀書踰夜分
 劉淑人恐過勞戒之甚嚴潮藏燈帷中默誦不輟勁菴器之拊
 其背曰兒他日必充吾宗吾何戀此小官為邪九載考績遂力
 乞休致銓部異之陞湖廣布政司照磨不赴任歸肄業山中每
 朔望歸省途次必復屬文一篇越正德庚午舉於鄉辛未連舉
 進士入翰林為庶吉士迎養劉淑人於京邸癸酉授編修甲戌
 充會試同考試官教讀內館丁丑請假還鄉庚辰復任嘉靖辛
 巳世宗踐祚充經筵展書官壬午預修武廟實錄乙酉
 陞侍讀充經筵講讀官實錄成陞司經局洗馬賜金幣丙

戌充殿試受卷官丁亥陞侍講學士兼日講并撰誥勅日
 錄國史時上方銳意文學日進儒臣講論經史日潮舉動
 間整敷說詳明每心識之明年戊子主應天鄉試初下詔變文
 體就切實殫心校閱得名士而梓文詞達理到士咸服其知言
 巳丑充殿試讀卷官庚寅奉詔與議郊祀禮潮據經引史
 旁及子集斷以祖宗之舊反覆辯論幾及三千言大約謂禮
 之可疑者八難行者二一曰合祀之說雖證以昊天有成命詩
 序而其詞却又專頌成王主分祀者不過援周禮奏樂於圜丘
 方丘數語而北郊則僅創自漢儒標取孝經緯文天神主北神
 地祇主崑崙而言殊為荒謬二曰六經惟祭法有祭天泰壇祭

地秦圻之語而亦無南北郊文唐賈曾表引春秋說王者一歲七祭天地合食於四孟王肅述孔子云祭天而地配於經皆無所據三曰易殷薦上帝以配祖考舜典止肆類上帝及祀六宗山川羣神周禮以禋祀昊天上帝以實柴祀日月星辰而司中司命風師雨師社稷山澤四方百物各以物祭及月令凡祭祀亦斷自皇天上帝山川四方宗廟社稷之神而俱不及地豈地道從天與中庸所以祀上帝之文同乎四曰禮言郊禘或言郊廟或以社對帝或以社對郊釋之者曰言郊以知社稷之在國言社以知郊之為天地亦無的確五曰祭必有服司服掌王之吉服祀昊天上帝服大裘而冕享先王先公祀四望社稷五祀

羣小祀各有服冕何祀地祇獨無若同大裘則非夏至所宜六曰祭必有配祭義云郊之祭大報天而主日以配月考經云郊祀后稷以配天何北郊獨無配乎七曰朱熹嘗言古時天地定是分祭却又曰五峰言無北郊則祭社便是此說却好似亦矛盾八曰陰陽之義多矣如祭統以禘禘為陽義以嘗蒸為陰義祭義則曰祭日於壇祭月於坎以別幽明以制上下何天地獨無陰陽至若周禮一歲九祭天朱熹所謂當時禮數簡儀從省故易行者是以今於天歲止一祀而春秋既祭祀又專祀方丘則反崇地亢天非尊卑相承之道此難行者一也且周正建子故二至祀天地於歲事為不紊今歲首在寅不從二至非順陰

陽之義從之則於序有乖皆不合周禮此難行者二也惟聖祖廟合祀已久雖其列壇從祀非古而當時著令命官分獻各以義起殊與漢晉唐宋神座千數百位者不同不若循舊爲便時上志先定分祀覽其言懇切婉盡亦不以爲非未幾南郊創造園丘都御史汪鉉請槩遷禁垣外冢墓上不忍遷限一里之內而止潮上疏曰此正陛下不忍人之心發於至誠周文王行野見枯骨而命瘞之曰有天下者天下之主吾其主矣卒歛而葬之天下聞之曰西伯之澤及於枯骨况人乎今陛下事本敬天猶念及此卽文王澤及枯骨之仁也惟壇去外垣尚遠一里之墳塚不下千萬餘區倘於瞻對無妨悉容仍舊其

恩尤溥疏下內閣執政者詰謂褻穢園丘匪宜潮應之曰在園丘似褻然天無不覆卽遠遷何所逃詰者語塞竟得旨罷遷辛卯陞翰林院學士掌院事尋陞詹事府少詹事兼學士掌府事壬辰聘主會試適侍讀學士郭杏東起自家食倉卒同應聘梓文多出其手筆事已讀殿試卷先是嘗念母淑人年高邁疾三疏乞歸侍養上重其去不允會陞吏部右侍郎益嘆詫不懌曰忘親以戀官非子也復抗疏摺迫始獲允命給驛以歸入門拜慶淑人於床下三越月卒潮疏上聞賜諭祭一壇蓋特恩也服旣闋丙申起復吏部右侍郎丁酉轉左仍兼學士與經筵日講己亥加秩太子賓客充宮僚辛丑再掌翰林

院事教庶吉士壬寅陞禮部尚書掌詹事府事教庶吉士兼官
仍舊上疏辭讓 詔褒答之曰卿學行老成講讀效勞宮端重
任特茲簡用不允辭自入院日課諸吉士業辰集申散踰二年
如一日衆服其教 上聖學高明振綱馭下日益精勵慎賜予
重委用覽詞臣文字最難許可惟潮受知素深自爲吏侍迄今
亟遣代拜 先聖先師于永明後殿 遣省牲於 南郊正獻
於文廟分獻於 帝王廟陪祀於帝社稷於扈 駕謁陵拜銀
瓢方袋之 賜於冬至夏至拜曆日并川扇之 賜於均思王
題主拜金幣之 賜於祭金海靈明城隍東嶽之神各拜鎚幣
之 賜於祭金海靈明城隍東嶽之神各拜鎚幣之 賜癸卯

忽賜朱柿及 御覽曆則又特恩之所及矣嘗應制和 上奉

聖母遊覽有詩賀嘉禾瑞麥慶雲靈鵲有賦賀瑞雪甘露瑞兔有
頌賀時雨時雪有疏每被稱賞其時雨瑞雪中有雨珠玉不可
爲衣食之句則 溫旨特摘出以獎忠愛甲辰命主考會試卒
於貢院年六十占星者謂去冬文昌星次有白氣貫井分井分
在蜀白主喪潮蜀人主文章故應之蓋有數爲之先也潮器度
凝重與物無忤自少卽能詩文讀書過目輒成誦尤工楷書入
翰林后詩格益高文必根極理道不專尚華藻有玉溪稿若干
卷藏於家性至孝勁菴公卒時爲諸生喪葬卽遵古禮廬於墓
側者三年劉淑人病痰數以手掬之湯液必嘗而後進及卒泣

血扶柩途行三十里墓人多稱之

費案字

江西鉛山人正德辛未進士宏從弟嘉靖二十三

年以禮部尚書兼學士掌府事本年回理部事加少保詳禮部

孫承恩字

直隸華亭縣人正德辛未進士嘉靖二十三年

以吏部侍郎兼學士掌府事二十九年改理禮部事

歐陽德字

江西泰和人嘉靖癸未進士二十九年以吏部

侍郎兼學士掌府事本年丁憂

孫承恩詳前嘉靖二十九年禮部尚書掌府事三十二年致

仕

程文德字舜敷別號松谿浙江永康人父十峰公銓弘治己未

進士官至四川副使公端穎有異質五歲能日誦數千言稍長

博極羣書大司馬潘竹澗公奇之妻以女十五補邑弟子員從

楓山先生遊授以誠篤自治之學慨然志於聖賢正德己卯領

鄉薦上春官不第益憤發於學從陽明先生遊授良知訣反求

於心性嘉靖己丑進士第二授翰林院編修上郊祀議選庶吉

士疏靈雪頌靈鵲詩親蠶行內訓講章孝敬勤儉四詩上宴

近臣於無逸殿公得與上無逸講章奉勅纂修祀典會同年

四川楊公名上疏觸

上怒下

詔獄責主使者公述所聞繫

獄故事密投楊公爲守者所持上聞

上下錦衣衛急捕誤繫

御史陳九德公聞之毅然就繫而出九德比拷掠無一語黜爲

信宜典史總督陶公諧延主蒼梧書院檄兩廣士從講理學公倬然以斯文自任舉何王金許之學導之再主高明書院其教專主立志謂聖人必可學開示切要之語多士向風十四年改安福令立鄉約均里役治豪右之不輯者建復古書院以聚諸生十五年丙申陞南京兵部職方主事轉禮部精膳司郎中丁外艱二十年辛丑起復補兵部車駕郎中時北虜猖獗上備邊禦虜數事及造戰車法多見采行二十三年陞廣東按察副使未行轉南京國子祭酒與六館士約敦本實抑浮靡又爲葺號舍與射圃疏復館箴以學行擢御史舊典二十六年丁內艱二十九年庚戌擢禮部

郎會虜騎薄都城公督宣武門嚴詰

察盡入郊民之奔命者疏卹凋殘慎擒捕舒民兵三事三十一年壬子轉吏部左侍郎癸丑當大計專評騭賢不肖以裨銓政會試知貢舉事竣加兼翰林院學士掌詹事府事教庶吉士謂相才之儲兼德行文藝後寢寢藝焉爾益敦復其本以身先之兩直隸河南山東饑疏聽民輸粟散賑四省稱便 上禱祀西死命侍臣撰釐詞爭綴奇巧以進公獨寓諷意三十四年會推南京吏部尚書 上疏欲脫不經之奉改南工部左侍郎已疏辭有 旨褫職歸築室壽山角巾布袍聚徒講學杜足不入城市三十八年十一月以疾卒年六十有三性孝友事二親盡志善處其伯兄與人不設城府非禮亦不報恒居已於人之後生

平樂道人之善而諱其過取予嚴雖一介不苟清苦若寒士產
業守舊僅自給卒不能葬總督胡公賻之乃舉隆慶萬曆間以
臺省撫按先後請贈禮部尚書 賜葬祭謚文恭

終

國朝列卿紀卷之十七

國初詹事府少詹事年表

馮勝 直隸定遠人功臣洪武元年以右都督兼副詹事三年封宋國公

胡美 湖廣沔陽人功臣洪武元年以中書平章政事兼同知詹事院事三年封臨江侯

廖永忠 直隸巢縣人功臣洪武元年以中書平章政事兼同知詹事院事三年封德慶侯

李伯昇 直隸泰州人歸附洪武元年以中書平章政事兼同知詹事院事三年食祿不視事

趙庸 直隸合肥人功臣洪武元年以中書左丞兼同知副詹事三年封南雄侯

王溥 江西安仁人功臣洪武元年以中書右丞兼同知副詹事三年改河南行省參政

李文吉 人薦舉洪武二十五年任少詹事兼侍講本年改左僉都御史

祝春 山西蒲州人薦舉洪武二十五年任少詹事兼侍讀本年致仕卒

黃子澄 江西分宜人進士洪武二十五年任少詹事兼修撰

任亨泰 湖廣襄陽人進士洪武二十五年任少詹事兼修撰二十七年陞禮部尚書

辛彥博 山西汾州人監生洪武二十九年任少詹事兼侍讀三十年改右僉都御史

墨麟 陝西高陵人鄉舉永樂二年以兵部右侍郎兼少詹事五年卒贈少保謚榮毅

趙毅 河南汝陽人薦舉永樂二年以工部左侍郎兼少詹事七年謫交趾

國初詹事府少詹事行實

馮勝字 直隸鳳陽府定遠人追封宋國公文質季子鄧國

公國用弟也生時黑氣滿室若烟霧然經日不散人異之長而

謹厚姿貌磊落長軀勇毅且多智略有相者曰此子骨格清奇

特有英風烈氣他日必以武致富貴勝聞之曰吾立身願忠孝

弗富貴圖也是後喜讀書融會義理與兄國用講論兵法夜分

不寢智略益充暇則拉同志適閑曠馳馬試射以百步為的發

無不中衆服其能元季兵亂江淮雲擾念不能坐受魚肉歲甲

午與國用伏謁 太祖於妙山 上見而奇之用置左右從克

滁州三汲河和州版門砦乙未春陳也先犯和州人馬三倍我

師謀協 廟筭獲其全軍六月渡江拔采石取太平也先復擁
衆寇城下勝從諸將擊之擒也先 上釋也先勝知其懷異與
國用共防之竟不能爲害丙申二月敗元中丞蠻子海牙舟師
三月克臺城還軍從擊鎮江丹徒寧國擢萬戶丁酉攻下甘露
松山望亭戊戌取泰興宜興授元帥守禦國用先以丙申秋陞
帳前總制親軍都指揮使己亥夏疾卒其子誠幼不堪事庚子
春 命勝襲兄職仍掌親軍五月陳友諒陷太平遂寇龍灣
上命勝等戒備勝與諸將擊友諒於石灰山殺傷相當勝率敢死
士直衝其中堅敵披靡遂大破之溺死者數萬俘獲七千友諒
僅以身免 上命勝追至采石復戰友諒復敗遁遂復太平辛

丑二月攻高郵八月從 上親征友諒安慶水砦長驅至江州
友諒以爲神兵倉皇棄城走武昌遂克之得糧馬數多陞都護
癸卯三月張士誠兵圍安豐號二十萬劉福通請援敵殺福通
圍益急勝從 上往同諸將奮擊之敵敗走追奔踰境陞同知
樞密院事調擊廬州甲辰降陳理於武昌克廬州走左君弼乙
巳取江西諸郡復同徐達常遇春率馬步舟師進取淮東十月
克海安閏十月克泰州十一月徐達攻高郵 上恐深入敵境
不能策應諸將乃遣使卽軍中命勝帥所部節制高郵諸軍而
以達還軍泰州丙午三月勝克高郵四月下淮安安豐八月從
伐張士誠先薄淞西克舊館執吳將呂珍徇湖州城下李伯昇

出降進圍蘇州吳元年召還京治軍府事叅知政事張昶陰事覺命勝鞠之獲實昶伏誅九月論平吳功與諸將一體受賞陞銀青榮祿大夫大都督府右都督是冬奉命北伐克山東沂州益都兗州濟南戊申正月上卽位改元加兼太子右詹事二月總各衛軍馬取樂安元守將俞勝遁降其郎中張仲毅獲其將牛右丞三月引兵上黃河取汴梁四月克河南陝州直趨潼關守將張德欽穆薛飛等拒戰勝一鼓拔之李思齊張思道俱遁去遂取華州還汴梁謁上於行在上慰勞之授右副將軍留守汴梁十月調征山西克武涉懷慶獲將士八百餘人兵至太行山碗子城破其關元守兵奔潰進取澤州平章賀宗哲等棄城遁留兵戍守克潞州太原至猗氏擒元右丞賈成攻平陽克之擒李茂克絳州擒田保保徐伯昌獲將士五百餘人馬三百餘匹授征西將軍二月克河中陝西三月取鳳翔李思齊西奔臨洮獲其部將薛平章等四月取隴州鞏昌總京衛兵征臨洮思齊降其全部及銀印等物遣使報捷五月從大將攻圍慶陽擊敗張良臣兵於西閨復與大將謀移軍驛馬關花原州以絕良臣聲援則慶陽可破矣大將從之八月遂克慶陽承制統兵鎮守節制各鎮兵軍規措糧餉河州等處以次俱下十二月回京賜白金二百兩文幣十五表裏三年正月上以王保保等爲西北邊患命勝爲右副將軍帥師自潼關出西安

國朝及雅集

以擣之三月大破擴廓帖木兒於定西夷其營落獲輜重駝馬不可勝計王保保等俱北竄四月自秦州南出一百八渡至略陽擒元平章蔡琳遂入沔州又遣金興旺張龍由鳳翔入連雲棧合兵攻興元克之又西平土蕃征哨極於西北至冬凱還論功授開國輔運推誠宣力武臣特進榮祿大夫右柱國封宋國公與同叅軍國事食祿三千石 賜誥命鐵券其文曰朕聞歷代創業之君必有親同骨肉痛若肢體之將使之周旋左右出入以防奸詐遂得保完其身施行造化以有天下卽是而觀其功不少朕自淮渡江以來爾兄馮國用實典親軍導從有方動合古道俄而因疾長逝朕念其勞封爲郢國公憫其子幼故文

以爾勝繼之爾勝十餘年間居京師則除肘腋之患歷征戰則建牙爪之功敵犯龍江帥奇兵而大剽羣寇副將北伐屢克捷而平定中原宣力內外佐成混一今天下已定論功行賞朕無以報爾是用加爾爵祿使爾子孫世世承襲朕本疎愚皆遵前代哲王之典禮茲與爾誓除謀逆不宥其餘若犯死罪爾免二死子免一死以報爾功於乎爾以忠誠夙夜事朕累除奸惡爵祿之崇由爾勲勞而致尚其日慎一日持守高盈訓及子孫保於永世仍賜文綺及帛八十疋四年守鎮陝西修治城池 賜臨濠地若干頃佃戶若干守墳人百五十戶儀仗戶十九家仍賜第於京師五年詔爲征虜大將軍與副將傅友德陳德等北征

遇虜兵於別力篤山戰敗之擒獲將士甚衆乃分兵由西道取
甘州破元將失刺罕兵敗朶兒只把於虎刺罕口獲人口數十
萬羊馬駝稱是進拔肅州至亦集乃敗俞寶兵分布戍守扼塞
關寨始還六年七年練兵臨清北平繼往大同八年自大同征
元未下散不刺等地回鎮陝西九年練兵西征十年鎮河南五
月夫人何氏卒於京上遣使齎報計召還議葬事十一
年回鎮十二年董建周王宮殿興作以時一如聖諭十三年
九月享太廟賜米五百石是冬故元平章乃兒不花等寇邊
明年正月上命徐達率師討之命勝佩征虜大將軍印節制
河南賜手誥曰河南爲天下重鎮地廣民稠士馬衆方今

大將軍等征北特命爾等制其地宜休息民力訓練士卒以
佐征討時王府宮殿告成遣使齎勅諭勝曰今天象有警占
大梁乃爾所封之地爾今正在彼處當蚤夜謹畏王之宮殿
已成王城內外護衛嚴密馬步士卒各加訓練其在爾左右爲
圍子手者王府有馬毋令牧於遠地當令兩軍守一馬軍皆須
精銳者但有異聞時卽乘馬至報爾就語都指揮馬兒亦宜慎
防察人動靜九月勅諭勝曰天象屢見不可不警大梁軍民
雜處宜用撫安之令秦王晉王還京宜選精銳將士嚴密
宿衛王到之時宋國公出迎則都指揮守城都指揮出迎則宋
國公守城指揮軍士以三之一出迎餘悉令守城爾其夙夜加

慎毋忽十一月 勅勝曰聞有盜五百餘人由黃陂縣而西殺掠居民此必征南士卒畏避而逃者夫不用軍法罪固當死因而爲盜者又甚焉宜卽遣兵於汝寧南陽之地伺其出沒捕之十五年至十七年連鎮河南撫軍恤民民兵欣附明年以久鎮於外爲勞 上乃召還遣禮曹齎羊酒慰勞之其年秋授征虜大將軍總兵北征屯兵絳橋操練兩月而還是時殘元遺孽及元故將歸服殆盡惟納哈出尚擁衆金山時爲邊患 上以蠢虜負固非得宿將重臣統大軍聲討終未馴附二十年佩征虜印總步騎三十萬往征師抵金山納哈出懼而遁勝遣驍將率精騎窮追納哈出敵知不可免乃乞降並降其學士也先帖木

國公官童平章蠢臺所部二十餘萬咸附悉驅入山海各城屯住捷聞 上大悅卽旋師城大寧二十一年往東昌等處調達兵隨穎國公征雲南達兵至常德四川叛其令遂往永寧鎮守沿邊撫安達兵二十三年春 上肅清逆黨榜列勲臣凡五十七首功高望重嘗總兵者八人勝居其三其見褒重如此是秋詔還鄉賜緡鏹金帛甚厚二十四年秋命率山西平陽等郡塚軍發大同等衛屯種三十二年癸卯十月十日卒 朝廷哀悼遣祭勅有司治喪以明年二月五日附先墓葬焉子男皆先勝卒女一周王妃

胡美初名廷瑞避御字改今名湖廣沔陽人元至正間仕陳友

諒為江西行省丞相守南昌辛丑年 太祖拔江州率城來附
 命仍舊官吳元年以平吳功陞榮祿大夫中書省平章政事十
 月命為征南將軍率安吉寧國南昌袁贛滁和無為等衛軍由
 江西取福建 上喻美曰征伐所以奉天命平禍亂安生民故
 命將出師必得其人汝以陳氏丞相來歸事吾忠實無過故命
 汝總兵往取福建江西左丞何文輝為爾之副湖廣叅政戴德
 隨征從汝調發二人皆吾親近之人勿以此故廢軍政凡號令
 征戰一以軍法用事聞汝往年嘗攻閩中必深知其地里險易
 今總大軍進征凡攻圍城邑必擇便利可否為之進退無失機
 宜克定之功全賴於汝十一月即師度杉關略光澤縣下之十

二月師至邵武元守將李宗茂以城降得將士五千四百餘人
 至建陽降其首將曹俊疇命指揮沈友仁守之洪武元年正月
 上即帝位功臣進秩詔美以榮祿大夫中書平章兼同知詹事院
 事是月壬午率師至建寧元守將同僉達里麻叅政陳子奇集
 僚佐謀備禦甚堅美等進兵數與挑戰達里麻等固守不出我
 師環其四門攻之壬辰克建寧時美督兵攻城益急達里麻不
 能支夜潛至文輝營納款詰旦總管翟也先不花亦率眾請降
 美乃整軍入城中嚴號令秋毫無所犯執陳子琦送京師獲將
 士九千七百九十餘人馬二百七十三匹銀一萬六千三百兩
 糧九萬八千六百四十石命指揮費子賢領兵守之二月克興

化遣建陽降將曹俊疇招諭汀州寧化連城等縣元汀州路守將陳國珍納款泉州郡縣相繼降附時王師已取福州延平福建悉平統兵守禦五月上幸汴梁召還扈從凡行在機務悉預區處兵行無擾於民二年十二月大賞征南及守禦功賜白金二百五十兩文幣十七表裏三年七月往河南等處招集故元王保保所部亡散士卒凡占籍在洪武元年者聽爲民二年以后者收入兵伍十一月大封功臣授開國輔運推誠宣力武臣榮祿大夫柱國封豫章侯食祿一千五百石令世賜誥命鐵券仍賜文綺及帛四十疋十三年正月改封爲臨川侯誥券文與前同六月遣使齎勅至湖廣諭美曰昨者上天垂戒朕思治

理恤民爲先其王府一切役作宜皆停罷時美董建潭王府於長沙故以是諭之二十六年卒餘詳中書省平章

廖永忠直隸廬州府巢縣人元至正兵起乙未年同兄永安以舟師附太祖從渡江歷樞密僉院同知樞密事甲辰平僞漢功陞湖廣行中書省左丞吳元年以平吳功陞榮祿大夫中書省平章政事十一月征南將軍湯和旣下溫台慶元方國珍遁入海島上命永忠爲征南副將軍帥帥自海道會和討之初國珍遁海中尚冀少延及聞永忠兵威益駭惑失措遂率昆弟子侄詣軍門乞降得其兵械舟楫以萬計乃以谷珍及其降表送建康十二月帥舟師自明州海道徑取福州戊申正月上

卽帝位改元洪武諸功臣進秩詔永忠以平章兼同知詹事院
事時福州已下略定閩中諸郡兵至延平元叅政文殊海牙以
城降執元守臣平章陳友定閩地悉平二月癸卯 上命永忠
爲征南將軍叅政朱亮祖爲副率舟由海道取廣東丙辰永忠
自福州遣人以書至廣東諭元江西分省左丞何真三月壬午
永忠率舟師趨福州航海趨廣東壬辰師至潮州何真遣其都
事劉克佐詣軍門以廣潮惠款附上其印章并所部圖籍四月
辛丑朔師至東莞何真率官屬出見乙巳師次虎頭山門小張
元帥以所部來降戊申師至廣州市龍潭元將盧左丞遣鎮撫
盧成納款得海舟五百艘軍士二千九百餘人馬三百匹糧五

千餘石命指揮胡通守之乙卯遣兵攻破僞叅政邵宗愚山寨
獲宗愚等斬於廣州市新會縣土豪黃彬河源縣曹文昌汲州
廖仁等復聚衆作亂自稱元帥永忠捕誅之南海縣人麥康祖
以魘魅蠱毒殺人又捕斬之民大悅服由是諸郡相繼來歸永
忠一一勞而撫之乃馳驛往諭九真日南朱崖儋耳三十餘城
皆納印請吏不敢或後廣東旣平遂進取廣西六月丙午兵至
梧州境元達魯花赤拜住率官文父老迎降廣西行省平章林
文之亦降時元吏部尚書普顏帖木兒張翔以便宜行事入廣
西次藤州聞永忠兵至走鬱林亮祖勒兵來追之普顏帖木兒
戰死張翔赴水死於是潯貴等州郡以次咸附七月甲午兵至

梧州容州同知明安普化暨普寧縣達魯花赤間買皆率父老
迎謁丁酉師次貴州元鬱林州知州張那海同知王楚金降於
軍門永忠因遣亮祖會平章楊璟收未下州郡八月壬戌亮祖
與璟合兵攻克靖江執元平章也兒吉尼戊辰永忠至南寧元
上浪屯田千戶宋真執其守將平章咬住叅政那海遣使請降
永忠悉收諸司印章命真守其城送咬住等赴京九月戊子元
平章阮思蘭以象州降廣西悉平二年八月戊午永忠亮祖率
師還至京上命皇太子率百官迎勞於龍灣比入見上
撫慰懽甚既退復命皇太子送永忠還第十二月上大賞
諸將念其功賜白金二百五十兩文幣二十表裏三年七月泉

州漳州不靖永忠往撫之悉定其地十一月大封功臣授開國
輔運推誠宣力武臣榮祿大夫柱國封德慶侯食祿一千五百
石賜誥命鐵券餘詳中書平章

李伯昇字

直隸揚州府泰州人元末兵起仕張士誠爲浙

江行省叅政守湖州丙午王師攻湖州以城降命仍其官洪武
元年進榮祿大夫中書平章仍兼同知詹事院事二年征守陝
西三年十一月大行封賞賜文綺及帛十六疋上欲優待之
命食中書平章祿不署事子孫世襲指揮僉事五年命爲征南
右副將軍統兵討靖州五溪等處蠻寇功與江陰侯同上甚
嘉之十一年定省臺官等歲祿之數伯昇每歲給七百五十石

於官田內給與十三年春命往漳州理軍務未幾遣使齎符召還餘詳中書平章

趙庸小字老哥直隸廬州府合肥縣人元至正兵起甲午年同兄伯仲來附從 太祖渡江立功庚子年伯仲伏誅命襲兄職授命行樞密院事壬寅年平江西陞中書省叅知政事吳元年陞資善大夫中書省左丞十月從大將徐達取山東十一月克沂州益都十二月下濟南戊申正月 上卽帝位改元洪武諸功臣進秩詔庸以中書左丞兼太子副詹事二月克東昌取棣州三月克汴梁四月率步騎自中灤進取河南又自虎牢關進至河南塔兒灣元將詹同脫因帖木兒戰敗走陝州遂進營於

河南城北門其行省平章梁王阿魯溫送款軍門遂克河南命庸守之七月達旣拔關陝擇將鎮守謀取元都庸與諸將各領軍衛分布士馬渡河徇取河北州縣閏七月克衛輝下彰德取廣平至臨清趨德州克長蘆直沽河西務通州八月庚午克元都九月克河間守之大軍尋下保定中山真定十一月徐達至真定會常遇春於柳亭調庸守保定令收諸未附山寨十一月從克太原二年從下陝西鳳翔鞏昌臨洮諸郡走張良弼降李思齊五月元將也速兵侵通州 上命庸從常遇春率兵東還拒之遂搗永平過惠州獲江文清士馬以千計至大寧也速遁破開平元君又北奔追至北河俘其宗王三人及平章鼎住等

凡得軍士萬人車萬輛馬三千牛五萬師還燕時慶陽未下

上命庸副李文忠率師往應徐達合攻之八月癸亥庸自北平行至大原聞元兵攻大同文忠謀於庸遂由代出鴈門至馬邑適遊騎數千奄至猝遇我師與戰敗之擒其平章劉帖木進至白楊門前軍已駐營於饅元將脫列伯悉銳來攻我師先以兩營誘敵自寅至辰度其饑疲乃分軍爲左右翼奮擊大破之生擒脫列伯縛於軍門降其衆萬餘獲馬匹輜重甚衆遂進兵東勝州莽歌倉而還未幾慶陽亦平十二月上大賞平定中原諸將謂左丞趙庸從大將軍克平山東河南燕冀秦晉等處州郡又從開平王自陝西復取上都後克副將軍同平章李文忠總

兵山西應接大將軍乘勝勦捕生擒脫列伯驗其功勞賞白金二百兩文幣十九表裏三年正月同文忠領兵征伐二月師出野狐嶺降其守將進師察罕腦兒擒其平章祝真三月甲午同文忠敗元太尉蠻子平章沙不丁朶兒只八剌等於白海子之駱駝山所遂進次開平獲元平章上都罕等五月十五日同文忠率師比至應昌克其城獲元君之孫買的里八剌及后妃宮女金寶玉冊省院諸官知元君於四月二十八日以疾殂太子愛猷識里達臘以數騎北奔追之不及而還又至苦脫孫追太尉蠻子及奧魯軍擒元平章伯答兒獲馬駝無算過中興擒元將江唐國公進攻紅羅山其擁兵自固者皆請降大軍所至於

朔庭遂空十一月師還是月丙申大封功臣授開國輔運推誠
宣力武臣榮祿大夫柱國同知大都督府事封南雄侯食祿一
千五百石令子孫世襲 賜誥命鐵券餘詳中書左丞

王溥字

江西饒州府安仁縣人元末兵起仕陳友諒爲江

西行省平章守建昌辛丑年王師下建昌以城降命仍舊官甲
辰年以平僞漢遷資善大夫中書右丞洪武元年諸功臣進秩
詔溥兼副詹事從大將軍克平山東河南燕冀二年克陝西屢有
戰功賜文幣七表裏三年十二月天下既定論功行賞陞河南
行省平章 上欲優待之令食祿而不視事子孫世襲指揮同
知十一年定諸臣歲祿之數刻石官署溥每歲七百五十石於

官田內給與平章李伯昇潘原明祿同餘詳中書右丞

李文吉字

人洪武中由薦舉歷都察院

右僉都御史二十五年改詹事府少詹事本年復改左僉都御
史歷工部刑部侍郎詳南京刑部

祝春字

山西平陽府蒲州人洪武十七年以儒士舉除通

政司叅議二十四年陞左通政二十五年陞詹事府少詹事

年卒於官

黃子澄名湜以字行江西袁州府分宜縣人博學負俊聲游鄉
校同舍避席賦寒江把釣圖及枯梅詩人爭誦之洪武乙丑會
元廷試及第第三人特授翰林院修撰尋兼春坊官侍 東宮

講讀二十五年進少詹事兼修撰二十七年遷太常寺卿詳太常寺

任亨太字

湖廣襄陽府襄陽縣人洪武戊辰進士第一人

授翰林院修撰二十五年陞少詹事兼修撰二十七年上重其學行陞禮部尚書尋出使安南詳國初禮部

辛彥博字

山西汾州人洪武中由大學生擢監察御史進

都察院左僉都御史二十九年改詹事府少詹事三十年復改右僉都御史永樂初降御史詳國初都察院

墨麟字

陝西西安府高陵縣人洪武甲子鄉舉革除中陞

北平副使靖難師起命守北平總督軍餉壬午年文廟入正

大統陞刑部右侍郎尋改兵部右侍郎永樂二年仁宗儲德

東宮命兼少詹事五年卒於官贈少保謚榮毅詳國初兵部

趙毅字致遠河南汝寧府汝陽縣人父好德為吏部尚書洪武

末年以儒士薦舉授工科都給事性孝甘布素善屬文工草書

輕財下士素以行誼重於鄉在科忠厚識大體為文廟所眷

注永樂二年陞工部左侍郎本年命兼詹事府少詹事四年丁

憂本年奪情起復七年坐事謫交趾卒於途詳國初工部

國朝列卿紀卷之十八

詹事府少詹事年表

鄒

濟

浙江錢塘人薦舉永樂十八年任兼侍讀
學士二十二年卒贈太子少保謚文敏

郭

璉

直隸新安人監生永樂二十二年以
吏部左侍郎兼少詹事歷吏部尚書

郭

敦

山東堂邑人鄉舉永樂二十二年以戶部
左侍郎兼少詹事宣德二年陞戶部尚書

曾

棨

江西永豐人進士宣德五年任兼侍讀
學士七年卒贈禮部左侍郎謚襄敏

王

直

江西泰和人進士宣德五年任兼侍讀學士正統
三年陞禮部左侍郎歷少傅吏部尚書卒謚文端

王

英

江西金谿人進士宣德五年任兼侍講學士正統
三年陞禮部左侍郎歷南京禮部尚書卒謚文忠

項

文曜

浙江淳安人進士景泰三年以吏部左
侍郎兼少詹事天順元年謫戍口外

薩

琦

福建閩縣人進士景泰三年以
禮部右侍郎兼少詹事五年卒

劉鉉 直隸長洲人鄉舉天順元年任兼侍讀二年卒贈禮部左侍郎謚文恭

孔公恂 山東曲阜人進士天順三年任兼侍講學士

司馬恂 浙江山陰人解元天順七年以右贊善陞任兼侍講學士

李泰 詳詹事成化三年任

柯潛 福建莆田人進士成化三年任兼侍講學士四年丁憂

萬安 四川眉州人進士成化三年任兼學士五年入閣歷少師華蓋殿大學士卒謚文康

徐溥 直隸宜興人進士成化十年任兼侍講學士十六年陞太常卿歷內閣少師華蓋殿大學士卒謚文靖

黎淳 湖廣華容人進士成化十三年任兼侍讀學士十四年陞吏部右侍郎歷南京禮部尚書卒謚文僖

王獻 浙江仁和人進士成化十三年任兼學士十七年陞太常寺卿兼學士卒贈禮部左侍郎

楊守陳 浙江鄞縣人進士成化十六年任兼侍講學士十七年陞吏部右侍郎兼府丞卒謚文懿

劉健 河南洛陽人進士成化二十二年任兼學士二十三年入閣歷少師華蓋殿大學士卒謚文靖

汪諧 詳詹事成化二十三年任兼侍講學士

程敏政 詳詹事成化二十三年任

費閏 見詹事弘治二年任

謝遷 見詹事弘治四年任

吳寬 詳詹事弘治四年任

陸簡 詳詹事弘治四年任

張昇 江西南城人成化己丑侍講學士九年陞禮部尚書治七年任兼

王鏊 直隸吳縣人成化乙未進士弘治十一年任兼侍讀學士十三年陞吏部尚書

梁儲 見詹事弘治十六年任

王華 浙江餘姚人成化辛丑進士弘治十六年任兼學士本年陞禮侍歷南京吏部尚書

劉機 見詹事弘治十六年任

楊廷和 見詹事弘治十八年任

江瀾 浙江仁和人成化戊戌進士弘治十八年任兼學士正德元年陞吏侍歷南京禮部尚書

蔣冕 見詹事正德六年任

顧清 直隸華亭人弘治癸丑進士正德十一年任兼學士十二年陞禮侍歷南京禮部尚書

方獻夫 廣東南海人弘治乙丑進士嘉靖四年任兼侍講學士六年陞禮侍歷內閣少保武英殿大學士

霍韜 詳詹事嘉靖五年以兵部主事養病陞少詹事兼侍講學士

黃綰 見詹事嘉靖六年任

夏言 江西貴溪人正德丁丑進士嘉靖十年任兼學士本年陞禮侍歷內閣少師華蓋殿大學士

張潮 詳詹事嘉靖六年任

崔銑 河南安陽人弘治乙丑進士嘉靖十八年任兼侍讀學士本年陞南禮右侍郎

孫承恩 詳詹事嘉靖十八年任

江汝璧 江西貴溪人正德辛巳進士嘉靖二十三年任兼侍讀學士本年下獄為民

王用賓 陝西咸寧人正德辛巳進士嘉靖二十四年任兼侍講學士二十六年間住歷太子少保禮部尚書

黃佐 廣東香山人正德辛巳進士嘉靖二十五年任兼侍講學士二十六年間住

王用賓 見前嘉靖二十八年起原職再任二十九年陞禮侍

尹臺 江西永新人嘉靖乙未進士三十四年任兼侍讀學士

馬自強

陝西同州人嘉靖癸丑進士隆慶五年任兼學士歷吏部左侍郎禮部尚書太子太保文淵閣大學士卒

陶大臨

浙江會稽人嘉靖丙辰進士隆慶五年由南祭酒任兼侍讀學士六年陞詹事

申時行

直隸吳縣人嘉靖壬戌進士萬曆元年任兼侍讀學士

王錫爵

直隸太倉人嘉靖壬戌進士萬曆三年由祭酒陞少詹事陞侍讀學士掌府事

陳思育

湖廣武陵人進士萬曆九年任兼侍讀學士歷禮部右侍郎轉左尋削籍

余有丁

浙江鄞縣人嘉靖壬戌進士萬曆六年任兼侍讀學士

沈一貫

浙江鄞縣人隆慶戊辰進士萬曆十一年以少詹事兼侍讀學士

王家屏

山西山陰人隆慶戊辰進士萬曆十二年以少詹事兼侍讀學士協理府事五月陞禮部右侍郎

張位

江西南昌人隆慶戊辰進士萬曆十二年以少詹事兼侍讀學士

徐顯卿

直隸長洲人隆慶戊辰進士萬曆十三年由北祭酒陞少詹事兼侍讀學士十四年陞詹事掌翰林院

趙志臯

浙江蘭谿人隆慶戊辰探花萬曆十五年由南祭酒陞少詹事兼侍讀學士掌府十月南吏部侍郎

盛訥

陝西潼關籍定遠人隆慶辛未進士萬曆十年由祭酒陞少詹事兼侍讀學士協理府事

黃洪憲

浙江秀水人隆慶辛未進士萬曆十年以少詹事兼侍讀學士

詹事府少詹事行實

鄒濟字汝舟浙江杭州府錢塘縣人蚤喪父事母以孝稱天資穎敏好學強記稍長游縣庠材識為同輩所服縉紳君子多重之

餘杭令聘教縣學遂奉母從家焉而毅然師道自任振起諸生皆趨於學一新學舍自令丞以下皆嚴敬之秩滿陞中都國子學錄又陞國子助教一時國學之為師者皆樂與交為弟子者多樂就其講下無幾坐事自陳左遷西安府學教授未赴改

河間府學用薦者陞平度知州階奉訓大夫廉簡寬厚吏民安之丁母憂永樂元年服闋用翰林修撰李貫舉修實錄官撮事

撫要井井有章三年書成賜鈔衣一襲幣表裏各四白金五

鄧召林

國朝及外系

卷之十八

五

鄧召林

十兩陞禮部儀制郎中階奉議大夫進奉政大夫時朝廷祭祀冊拜慶賚及儀物制度徵舊章參古典闔部一資於濟五年安南叛詔大將軍帥師討之擇朝臣有文學者往司奏記濟承命以行軍事多所助益安南既平還京五年餘黨復叛王師再出濟亦繼往還陞廣東布政司右叅政務持大體而簡重寬平以率郡邑嶺海之區政化行焉八年坐累左遷吏部郎中數月擢左春坊左庶子在輔導之職言無不從寵遇特厚奉令旨授皇孫明經善於啓迪十八年秩滿陞詹事府少詹事階中順大夫濟爲人和易坦夷不見崖岸於物無所迂自公卿下至武人庸隸皆樂親之其學長於春秋爲文章不煩思索舉筆立就所居號願菴客至必具酒相與傾洽遇朋徒之會山水之遊輒欣然從之不以事廢兼嗜老釋之書旁通深造雖其徒尊宿者莫或過之二十二年卒年六十八贈太子少保謚文敏郭璉字時用直隸保定府新安縣人國子生精於吏事簡切不泛永樂初爲戶部主事以勤敏著稱已爲文廟所知歷陞福建叅議山東叅政俱有政績五年進工部侍郎九年命往湖廣督武當山宮觀事集而人不擾事竣回部十九年定鼎北京特命安撫江西軍民考察官吏二十二年改吏部會仁廟嗣位益隆眷注命兼詹事府少詹事仍改今名暨宣廟嗣位又命掌行在詹事府事四年憲義以年老輟吏部政務贊謀密勿遂

立就所居號願菴客至必具酒相與傾洽遇朋徒之會山水之遊輒欣然從之不以事廢兼嗜老釋之書旁通深造雖其徒尊宿者莫或過之二十二年卒年六十八贈太子少保謚文敏郭璉字時用直隸保定府新安縣人國子生精於吏事簡切不泛永樂初爲戶部主事以勤敏著稱已爲文廟所知歷陞福建叅議山東叅政俱有政績五年進工部侍郎九年命往湖廣督武當山宮觀事集而人不擾事竣回部十九年定鼎北京特命安撫江西軍民考察官吏二十二年改吏部會仁廟嗣位益隆眷注命兼詹事府少詹事仍改今名暨宣廟嗣位又命掌行在詹事府事四年憲義以年老輟吏部政務贊謀密勿遂

進尚書代義理部事餘詳吏部

郭敦字仲厚山東東昌府堂邑縣人洪武癸酉鄉舉入大學擢戶部廣西司主事陞衢州知府有善政後廷臣有言敦廉正不阿者召爲監察御史陞河南布政司左叅政公明勤約才識超邁時京師營造率民赴役聞敦行皆歡趨之無後期者無幾調陝西端重有威僚屬敬畏以公務留京師禮部尚書胡濙言其行於成祖曰郭敦有大臣體宜在左右即日召見以病不克入遂遣御醫視之疾愈入謝獎勞再三賜鈔襲衣明日陞禮部右侍郎十九年定鼎北京命巡撫順天等府安恤軍民考察官吏二十二年仁宗臨御以居大行喪不齋戒公宿

降太僕寺卿十月進戶部左侍郎兼詹事府少詹事宣德二年陞戶部尚書詳戶部

曾榮字子啓江西吉安府永豐縣人幼穎敏端重言笑不易五歲盡識象戲字七歲從學伯父兩臯十五以其所學訓族人子弟十七出教新淦胡氏塾已有名時儒者鄒仲熙鄒幼亨皆忘年與之交二十充邑庠生教諭戴正心文學老成尤重榮旣作詩勵之復爲龍說期其大用永樂元年中江西鄉試明年禮部會試中選者四百七十七人名在第八廷試遂中第一賜進士及第成祖奇其才親批所對策褒美之賜冠帶朝服授翰林修撰承務郎未幾詔解縉選進士二十八人俾進學文淵

閣祭為之首。上嘗召問典故，奏對如響。每應制詩文，皆立就。由是深沐寵眷，纂修永樂大典。命為副總裁，授儒林郎。五年陞侍講，授承直郎。六年丁內艱。七年大駕巡狩北京，起復扈從。同邑有坐奸黨事逮祭者，人以為危。成祖特原之，謂曰：朕惜爾才也。所居西長安門外，家人不戒火，延及禁垣。上亦以祭故置不問。嘗謂諸才俊賦天馬海青歌於上前，獨先成詞氣豪宕。上深加歎賞。陞承德郎。十六年滿陞侍讀學士。與修太祖高皇帝實錄成，重沐賜賚。丁父憂，復起就職。仁宗嗣位，宣宗正位，儲宮陞右春坊大學士，仍兼侍讀學士。授奉議大夫。賜誥命。洪熙初元，侍宣皇監國南京。宣德改元，與

修兩朝實錄五年書成。賜織襲衣，白金文綺。進詹事府少詹事，仍兼前職。賜寶帶，日直文淵閣。歲時累拜御酒珍饌，白金鈔幣之賜，恩意隆洽。六年趨朝，以欬嗽遽引退。上遙見之，詔免朝，叅益敬慎，弗懈。七年疾復作。上亟命醫往治。祭知不起，自為贊遺，相知訣別。遂卒。年六十有一。贈禮部左侍郎，謚襄敏。王直，江西吉安府泰和人。永樂甲申進士，由庶吉士歷陞修撰，侍讀右春坊右庶子。宣宗即位，與修兩朝實錄成。陞詹事府少詹事，行實詳吏部。

王英，字時彥，別號泉坡。江西金谿人。永樂甲申進士。第時成。

祖方銳意育才。命翰林學士解縉選進士穎秀者與狀元曾
棨等通得如二十八宿之數。俾盡讀文淵閣古今書。作為班馬
韓柳歐蘇文字。命大官日給珍饌。月賜油燈之資。數召至便
殿。問以經史諸子故實。或至抵暮方退。英在二十八人之中。每
為儕輩推讓。後上以綽綸事重。以英與王直皆慎密。可與竝
任。揀入秘閣。書進呈機密奏疏。歲戊子。預修太祖高皇帝實
錄。丁亥。授翰林修撰。扈蹕巡狩北京。丙申。陞翰林侍讀。戊戌。
實錄成。賜襲衣綵段鈔錠。壬寅。胡寇犯邊。二月。上親征。命
扈從至闊灤兒海。五月。旋師。過威虜鎮。李陵城已四十里。上
召諭曰。聞李陵城有石碑。可往視之。明日還。備奏其故。上曰。

此碑既鐫。有韃靼姓名。異日胡虜一見之。必以此地為已物。爾
宜再往擊碎之。用火煨沉之於河。以絕其爭端。英如旨而往。
既還。奏上喜。謂曰。秀才。是二十八人讀書者。朕需爾為用。正
好宣力。勿憚勞苦。因問曰。朕率師伐虜。爾試言成功如何。對曰。
胡寇犯邊。罪在不宥。但聞天兵親征。必遠走漠北。臣願陛下
下幸毋入險窮追也。上笑曰。朕為天下國家計。秀才之言。惟
不欲窮兵黷武耳。復謂曰。凡軍中一切動靜。或謠言之類。爾有
所聞。即來密奏。又諭太監孟驥曰。秀才有事。即令入見。毋阻。
六月。上駐蹕安平鎮。立功官軍。因有過不與口糧者。多相聚
悲泣。曰。吾等糧盡。必死道路矣。英以為言。上悅。即令兵部尚

書李慶人給口糧并載衣甲驢一匹甲辰 上復親征胡虜還次榆林川晏駕時 仁宗在東宮命尚書蹇義夏原吉學士楊榮楊士奇侍讀王直與英同定喪禮議國政宿內閣凡七日

仁宗嗣位加恩賜白金綵段八月進秩侍講學士尋陞右春坊大學士兼翰林侍講學士明年乞歸省 賜鈔二千緡俾馳傳而還

宣宗卽位嘗召入便殿謂曰洪武中學士有宋濂吳沈朱善劉三吾永樂初則解縉胡廣俱有重名念汝當講經史陳道義以啓沃朕心罔俾前人獨專其美 賜內醞及鈔千緡 命入內閣叅預中秘宣德庚戌修 太宗仁宗兩朝實錄成 賜白金綵幣襲衣陞詹事府少詹事兼翰林侍講學士復 賜金

箱琥珀麒麟帶壬子正月聞太淑人曾氏喪 上命禮部賜祭

工部造墳遣中官阮童護奔喪冬十月奪哀還 朝寵遇日隆

不時 召對正統間開 經筵爲講官陳說詳明於文義之外多有規諫之語其講章於朝退之際人爭求去以爲珍寶修

宣宗實錄與少師楊士奇同楊榮爲總裁實錄成 賜白金百兩

綵段鞍馬進秩禮部左侍郎兼翰林侍講學士詳南京禮部

項文曜字應昌浙江嚴州府淳安縣人宣德癸丑登進士觀政

兵部尚書王驥奇其才俾修馬政復奉使西洋各以能稱授兵

部主事未幾征麓寇及整飭遼東邊備皆著勞效尋除兵部職

方司郎中正統十四年 車駕北狩時于謙爲兵部尚書喜其

有幹局遂陞兵部右侍郎爲人機警善因事以成謙之美故謙多信任之景泰二年吏部缺右侍郎時欲用文選郎中李賢因嫌於陞本部與王直並又因謙薦文曜遂調吏部及至吏部時何文淵同王直爲尚書見寵於景帝復阿附之三年以易儲轉左兼少詹事言官劾其儉邪謙力庇之時謂之于謙妾云每朝待漏時必附謙耳密言不顧左右相視及退朝亦然行坐不離旣在吏部亦如是吏部尚書王直世稱儒者謙初甚敬之已而被文曜毀之謙爲是頗慢直嘗論其老不去蓋文曜有代直之意又忮刻懷舊怨訓導吾豫景泰中應薦至京以屢言邊事兵部奏宜邊用而在邊不得久支俸請於吏部文曜曰是嘗攪我兵部者何可與之王直曰官必有俸自須與之然竟亦莫能與也詳吏部

薩琦字

福建福州府閩縣人宣德庚戌進士時宣宗欲

選進士之尤者績學以備宮僚命楊溥選進士得八人爲庶吉士琦爲之首命太和王直率之讀中秘書正統元年績成授翰林院編修三年秩滿陞侍讀景泰三年易儲之議漸萌時禮部缺侍郎上令閣下用學士爲之大學士陳循等擬劉鉉以進時江淵不悅乃退與內侍曰鉉素不能幹事不可用乃用琦超陞禮部右侍郎兼少詹事與易儲日見親密五年卒於官詳禮部

劉鉉字宗器直隸蘇州府長洲縣人生彌月而孤數歲入鄉塾輒有志向學雖衣食麤糲弗顧也未冠卽授徒里中從之者甚衆其言動規模如宿儒鄉之長者皆折輩行與交性孝友母遭疾刲股肉以進旦夕籲天求代比沒哀毀垂絕見者莫不敬歎事兄若嚴師雖加楚箠不怨迎寡弟養於家從父沒而絕嗣以父命出繼之永樂戊戌以善書徵入翰林明年中京闈鄉試未上春闈授中書舍人宣德己酉與修兩朝實錄成賜白金文綺陞兵部車駕主事仍蒞事內廷正統戊午與修宣廟實錄成進翰林侍講金綺之賚有加戊辰詔擇進士穎敏者爲庶吉士屬教之鉉懲曩之事虛文者慨然以師道自任俾力追

古作有一字未協者經月不置以故諸吉士大有所造后多以文學致名己巳進侍講學士景泰庚午主考京闈及揭曉第一人劉宣乃盧龍軍士同事者欲更之鉉曰朝廷立賢無方不可乃止時論躡之鉉未沒宣己第進士爲翰林學士矣初置經筵官居首選賜白金文綺寶鏹禮遇甚隆辛未夏不雨特遣祭四瀆壬申春缺祭酒衆難其人大學士高穀曰學行老成無如劉某者遂抗章薦之命下以鉉爲國子祭酒士類歡然有得人之賀鉉曰士子若室女當保愛之於是定程課示教條旦暮講解如恐弗及及有託權貴以求倖得者斥弗聽六館之士帖然時監生多潛住在京奔競成風鉉奏稱監生有家近在京

者當依親之時雖給文引仍在京潛住一聞行取不待勘到原藉官司輒詣部告病不曾還攬先復監亟求出身又有聞父母之喪托故在京守制及服未滿卽行起復速求利祿有傷風化請禁止之上命凡監生犯此者送問明年養母陳氏卒朝廷欲奪其情力求終制服除仍拜祭酒舊例監生依親月日俱准坐堂行取文書出部日卽爲虛曠景泰間劉鉉等奏准文書出部後俱以各布政司遠近爲限再準水程雲南四川貴州兩廣五個月福建七十日陝西江西湖廣兩個月南直浙江四十日山西山東河南一個月北直半月俱爲坐堂月日天順改元英皇復位念宮端必求宿德之儒遂陞少詹事日侍講讀輔導惟

謹二年卒於官年六十五上聞計哀悼曰安得學行純篤如斯人者遣禮部侍郎李紹諭祭其家贈禮部左侍郎謚文恭性介特絕輒媚之態立身以不欺爲主未嘗疾言遽色尚儉約已貴而猶儼居隘陋裕如也祿賜之餘必分惠宗族故舊之貧者恒館粟之僚友卒而乏者爲具後事又教其孤有至顯官者有病吏憐而舍之染其疾及家人或請遣之弗聽已而皆愈鄉人有繫逮不能明者爲白其冤其人感之懷金以謝鉉曰吾直爾公也豈爲私邪遂感泣而退其善行類此者甚多立朝無惰容不以寒暑久速而少變亦其志之堅定也楊文貞文定兩公皆重其爲人每稱道之家訓素嚴仲子瀚以進士使南戒之有曰

見利無苟得也。閱其衣篋以行，北還仍閱之，如故。乃喜曰：無玷吾門矣。平生耽嗜文籍，博極羣書，素有醞籍，爲文紆徐演迤，務造至理，詩古淡從容，自有餘味。方衆賢集於朝，以意氣相雄長，鉉獨用心於內，退然沉毅，略不與較。有假菴若干卷，稿藏於家。

孔公恂字

山東曲阜人。景泰甲戌進士，擢禮科給事中。以

衍聖公弘緒係大學士李賢婿，遂不次用爲少詹事。成化元年，改大理寺左少卿，自奏復少詹事。二年上疏，總兵中止，有朱永一人，諸總兵不平，言官劾之，出爲漢陽知府。四年卒於官。

司馬恂字

浙江紹興府山陰縣人。正統甲子，京舉解元，赴

春官不第，入監，擢刑科給事中。景泰三年，與易儲議，陞春坊右

贊善。天順七年，超陞詹事府少詹事。八年，兼國子監祭酒，掌監事。詳國子監。

李泰詳詹事，成化三年任。

柯潛字孟時，福建興化府莆田縣人。生有奇質，穎異絕人。數歲能作詩，十五能爲舉子程文。補邑庠生。正統甲子，領鄉薦，當赴會試，以未忍離親，未果行。遂携書入蓮峰僧舍，講讀不輟。戊辰會試，中乙榜，辭弗就教職，入胄監，攻苦茹淡，益肆力於學。景泰辛未，再至禮部，遂中甲榜，進對。大廷賜狀元及第，數日授翰林，修撰潛，丰神峻整，言動謹飭。是時翰林諸老多在，咸愛重之，爲之延譽。未幾，賜五倫書、五經、四書，尋用薦入。經筵自是凡

朝廷用人有制作加恩典皆與焉壬申四月陞右春坊右中允兼
 修撰五月預修歷代君鑒書成 賜白金十兩文綺二表裏甲
 戌二月禮部會試為同考試官五月 命預修寰宇通志丙子
 五月通志成陞司經局洗馬仍兼修撰加賜白金文綺八月考
 應天府鄉試舟泊淮揚有舉子鬻私者暮夜投潛潛叱之彼固
 以請以所賂遺置潛前潛怒命執付有司治以法是秋場屋肅
 然比揭曉咸稱得人還 朝乞歸省未行 英廟復辟改元天
 順更授尚寶少卿兼職如故仍許歸省己卯二月 命修 玉
 牒庚辰春 命偕呂學士原考禮部會試十二月 命充 東
 宮講讀官尋給 誥命進階奉直大夫癸未二月復 命偕陳

學士文考會試會場屋火罷甲申 憲廟嗣位以隨侍恩陞翰
 林院學士三月有旨選進士年少質敏者李東陽等十八人入
 翰林為庶吉士命教以古文詞學八月 上御經筵勅兼經筵
 官仍 賜白金三十兩寶鏹三千貫文綺二表裏九月奉 旨
 纂修 英宗實錄成化改元八月考順天府鄉試九月玉牒成
 賜鈔千貫是月再奉旨教庶吉士林瀚等二十四人十月 賜新
 刻貞觀政要十二月 命掌翰林院印丁亥八月實錄成陞詹
 事府少詹事兼翰林院學士 賜白金三十兩金織綵段三表
 裏折衣羅三表裏 賜宴禮部十月 賜大明一統志戊子二
 月 命日侍 經筵講讀自辛巳迄戊子凡遇午節輒賜牙骨

聚扇。上有御製清暑歌、解愠歌及諸家繪畫金織扇袋、五色圓壽絲縷虎頭繚畫文虎。七月有詔議。慈懿皇太后山陵事。內閣大臣先進章。潛率僚屬繼進論合葬於禮爲宜。明日文武羣臣又繼進。未得旨。復具疏以死請。曰：「朝廷大事，臣子大節，舍是奚所用心，頃之俱召至文華殿，諭可其奏，衆歡呼而退。十二月，賜經筵儒臣七人襲衣冠履。潛已聞父喪，上命卽其家賜之。旣而有司爲少卿公請祭，命并與葬，蓋異數也。潛感激銜哀，就道抵家，不入中門，寢苫枕塊，不脫襟帶，擇地於其所居之東一里許葬。和溫山麓，不忍離喪次。圖繪形式付其弟通州學正江董成之。時母戴宜人，在堂事之愈謹，備極甘脆。己丑九月，季弟澍病，親爲調藥，比卒殯殮，皆從厚。朔望易其服，哭失聲而後返衣。衰居苦次，君子謂之有禮。庚寅正月，戴宜人屬疾，越五日卒，哭慟絕而復甦。朝廷聞之，復遣官諭祭。辛卯四月有詔起復，時祭酒缺員難其人，上起用之。以厭士論，潛聞命具疏乞終制，大略言忠與孝豈有二致，事君事親初無兩心，使親喪可短，則他日所以事君者可知矣。上覽疏許之。初潛素無疾，至癸巳八月，久居苦塊，患左足風痺，寒熱繼作，自知不起，呼學正君與之訣，瞑目而逝。計聞上悼惜，遣官賜祭，復命工曹營葬。潛稟氣峭直，操行耿介，發爲文章，嚴整有法，類其爲人。其爲詩清新微婉，猶有風致。其性喜遊，供職之

國朝列傳已
卷之十八
王貴

暇時偕二三知己窮覽勝槩雅歌投壺分韻賦詩襟度豁如也
既掌院事卽詞林後圃結清風亭亭下鑿池蒔蓮決渠引泉公
退宴息其中至於遇事感發言論侃侃揚摧古今毅然自負故
雖庶僚已繫天下之望位日通顯望日益重雖嘗以聖賢之學
啓沃 聖心其平生所蘊蓄抱負蓋未及少施於天下故其歿
也士夫多傷之

萬安字循吉四川眉州眉山人正統戊辰進士時 英廟命純
選北方及蜀士爲庶吉士凡二十人安與選授編修景泰三年
以易儲陞左春坊司直郎仍兼編修四年陞右中允七年改尚
寶司丞兼編修天順戊寅改翰林院侍講侍 皇太子講讀六

年陞翰林院學士成化二年丙戌主考會試三年預修 英廟
實錄成陞少詹事兼學士初安同年在翰林者八人各爲黨友
惟安無所交李泰內臣養子也安與泰結爲腹心己丑內閣缺
人且欲用泰泰推安曰子先爲之我不患不至遂薦安陞禮部
左侍郎兼學士先入詳內閣

徐溥字時用直隸常州府宜興人景泰甲戌進士及第第二名
授編修天順元年丁丑兼司經局校書侍 東宮講讀成化紀
元遷左庶子兼侍講充 經筵講官兼纂修 英宗實錄五年
陞翰林院學士尋丁憂十年甲午服闋至京陞少詹事兼侍講
學士十一年乙未主考禮部會試十三年七月以母憂去十六

年庚子陞太常寺卿兼學士掌院事十七年辛丑再典會試陞禮部左侍郎詳內閣

黎淳字太樸湖廣岳州府華容縣人少苦問學從父宦遠遊與兄資深相師友天順丁丑舉進士第一授翰林修撰預修大明一統志癸未同考禮部會試成化乙酉憲宗卽位克經筵講官丙戌遷左春坊左諭德丁亥修英宗實錄成進左庶子甲午考順天鄉試丁酉修資治通鑑綱目成遷詹事府少詹事兼翰林侍讀孝宗正儲位日侍講讀戊戌擢吏部右侍郎性耿介寡合尤好直言居官屢除弊事初入翰林有言被謫者卽以書抵當道請救其人當道者雖不能用然心實重之詳南京禮

部

王獻字惟臣浙江杭州府仁和縣人景泰辛未登進士成化十三年任詹事府少詹行實詳翰林院

楊守陳字惟新浙江寧波府鄞縣人成化十六年任二十二年陞吏部左侍郎詳吏部

劉健字希賢河南河南府洛陽縣人景泰癸酉舉鄉試天順庚辰登進士改庶吉士尋授翰林院編修成化甲午進修撰丙申陞右春坊右諭德丁酉進左庶子丙午陞詹事府少詹事凡三任皆職輔導皇太子二十三年丁未孝宗錄輔導功陞禮部右侍郎兼翰林院學士入內閣詳內閣

汪諧詳詹事成化二十三年任兼侍讀學士

程敏政詳詹事成化二十三年任

費閭見詹事弘治二年任

謝遷見詹事弘治四年任

吳寬詳詹事弘治四年任

陸簡詳詹事弘治四年任

張昇字啓昭江西南城縣人成化己丑狀元授修撰在翰林

觥自持不少刻觚角十四年陞左春坊左贊善兼修撰十五年

陞左諭德仍兼前職二十一年丁憂弘治元年起復陞左庶子

兼翰林院侍讀時大學士劉吉用事威權隆赫又善駕馭言官

又忌昇抑之因天變上疏極言劉吉奸邪蔽主之狀且言其術

能駕馭臺諫聽其指使害人貴戚萬喜依憑宮壺兇談熏灼吉

與締姻請托公府賂入私囊詞甚激直吉諷六科十三道如魏

璋等交章劾昇陰阻言路遂左遷南京工部屯田司員外郎未

任丁憂吉初報復言官論已悉加貶竄而言官甘為鷹犬不愧

後孝宗知內閣與言官交通之弊於言官犯法不少假借一

時言路一清肅知懼不敢聽人主使舉劾人者昇一疏之力也

五年吉去召復原職七年陞少詹事兼侍讀學士每侍講經筵

閑雅詳明於篇終必有規諷至理亂邪正之際未嘗不反覆為

上誦之以資啓沃九年陞禮部右侍郎詳禮部尚書

王鏊字濟之直隸吳縣人成化乙未進士授翰林院編修閉門力學避遠權勢九載陞侍講 憲廟實錄成陞右諭德尋進侍講學士兼日講官每進講至天理人欲之辨君子小人之用舍必反覆規諭務盡啓沃方春 上遊後苑左右諫不聽鏊講文王不敢盤於遊田 上為罷遊召所幸李廣戒之時 東宮將出閣大臣請選正人以端國本首薦鏊乃以本官兼諭德尋陞少詹事兼侍講學士弘治十三年陞吏部右侍郎詳內閣梁儲見詹事弘治十六年

王華字德輝浙江餘姚人成化辛丑狀元授翰林院修撰弘治癸丑陞右春坊右諭德充 經筵講官進勸學疏 上然其言

御講日數丙辰三月特 命為日講官賜金帶四品服四月以選正人端國本會舉為 東宮輔導戊午三月命兼 東宮講讀於是 眷賜日隆是歲奉 命主順天鄉試辛酉主應天鄉試壬戌陞翰林院學士食從四品俸尋教庶吉士魯鐸等繼又命纂修大明會典踰年書成陞詹事府少詹事兼翰林院學士五月復命與編通鑑纂要六月陞禮部右侍郎仍兼日講詳南京吏部尚書

楊廷和見詹事弘治十八年任

江瀾字文淵浙江仁和縣人成化戊戌進士弘治十八年任詳南京禮部

蔣冕見詹事正德六年任

顧清字士廉直隸華亭人弘治癸丑進士選庶吉士授編修與修大明會典丙辰巳未連同考試稱得人癸亥丁內艱三月以會典成進侍讀正德初還朝與修孝廟實錄焦公芳貽公以風聞欲誣彭文思以附李孜省得進清云據實直書史職也他不敢與聞焦不能強中官蔣琮誣逐臺諫章疏雜沓時逆瑾方熾僉畏觸其黨莫敢涉筆清盡載其實有欲節略者清不爲動丁卯主南畿鄉試尋充經筵講官前後進講義必稽古兼規諷時政辭旨剴直逆瑾竊柄朝士多屈意清抗不爲禮鄉人張文冕用事附和者皆至美官清絕不與通有言清肯枉一刺高位卽可致清叱曰吾足可輕動乎吾知做吾官不知其他戊辰丁外艱巳巳實錄成例當進秩瑾銜之矯詔追論會典事降編修尋調南京兵部車駕司員外會憂不赴庚午瑾誅還侍讀辛未陞侍讀學士兼修玉牒甲午主武舉考試乙亥掌院事詔同輔臣照例考察疏辭不允九月有文綺之賜十二年丙子秩滿進奉直大夫尋陞少詹事兼翰林院學士充經筵日講官丁丑主考會試崇雅黜浮得士爲盛奉命教庶吉士陶鎔造就出門下若舒芬倫以訓陳沂汪佃馬汝驥俱名流嘗教內書堂不結生徒不使與子弟相接嘗曰此輩如穢物遠之猶恐其汚况近之也時儲位尚虛疏請預定不報車駕數巡幸屢請迴

鑾言甚切是歲陞禮部右侍郎詳南京禮部

方獻夫字叔賢廣東南海人弘治乙丑進士授禮部祠祭司主事正德五年改吏部文選司六年陞驗封司員外郎七年改文選本年養病嘉靖二年起吏部考功司轉文選三年時大禮未定獻夫進大禮論附張璁之議給事中張嵩曹懷辛僑安磐各疏論張璁桂萼霍韜首爲厲階席書獻夫私相附和而御史鄭本公等四十四人連章論獻夫居中內應以成夾攻之勢章皆下所司六月陞翰林院侍講學士九月上盡下諸司大禮疏之留中者詔禮部與璁萼獻夫會官詳議大禮始定獻夫請將璁等五臣所奏首以禮官之初議終以近日之會章編成二卷

刊布天下從之四年陞少詹事兼原官六年陞禮部右侍郎詳內閣

霍韜見詹事嘉靖五年任兼侍講學士

黃綰見詹事嘉靖六年任

